

Акафист Пресвятой Богородице перед Ея иконой, именуемой "Тихвинская"

(празднование 26 июня/9 июля)

Кондак 1

Взбранной Воеводе, Владычице нашей Богородице/ благодарственная пения восписуем о явлении чудныя Ея иконы,/ к Нейже притекающи присно избавляются от враг видимых и невидимых./ Ты же, Госпоже Неба и земли, яко милосердная Мати,/ прими ныне малое сие моление наше/ и неотступну никогда же сотвори милость Твою от нас и заступление,/ охраняючи от всех бед и напастей нас, зовущих Ти:// Радуйся, Владычице, милостивая о нас пред Богом Заступнице.

Икос 1



Ангелов лица ликовствующе служат Тебе, Владычице, и почитающе Тя, на руку Твоею носившую Творца видимыя и невидимыя твари, икону Твою с места на место переносят. Мы же, земнороднии, дивящися чудному явлению иконы Твоея, Ангелы носимыя, вопием Ти сице:

Радуйся, всех Небесных Сил вы́шая;/ **Радуйся**, вся ангельския чины превосходя́щая.

Радуйся, Честне́йшая Херувим;/ **Радуйся**, Славнейшая без сравне́ния Серафим.

Радуйся, радование Ангелов;/ **Радуйся**, похваление ликов небесных.

Радуйся, от Ангелов воспева́емая. **Радуйся**, от Серафимов прославля́емая.

Радуйся, от Архангел поклоня́емая;/ **Радуйся**, от воинств небесных почита́емая.

Радуйся, в иконе Твоей от Ангел чтима́я;/ **Радуйся**, в видимем образе Твоем от невидимых сил носима́я.

Радуйся, Владычице, / милостивая о нас пред Богом Заступнице.

Кондак 2

Видяще рыбаре над пучиною вод носимую невидимую силою и светом подобно солнцу сияющую Твою, Богомати, икону с Предвечным Младенцем, рыбарей призвавшим на уловление мира в сети спасения, возопиша: Аллилуиа.

Икос 2

Разум недоразуменный дивнаго явления иконы Твоя разумети людие ищуще уведеша, яко чтимая в Цареграде пречестная икона в наследие российскому роду даровася. Темже мы, благодаряще за милость Твою к роду нашему, вопием Ти:

Радуйся, Мати истинныя жизни; / Радуйся, послушанием Твоим преслушание Евы исцелившая.

Радуйся, затворенный Эдем отвёрзшая; / Радуйся, миру явившая Сокрушителя главы змиевой.

Радуйся, ковчеже Умирителя мира носивший; / Радуйся, мир спасшая от потопления греховнаго.

Радуйся, лестнице еюже сниде Бóg; / Радуйся, земных возводящая на небо.

Радуйся, море фараона мысленнаго потопившее; / Радуйся, купино, неопалившаяся всельшимся в Тя огнём Божества.

Радуйся, скрижале Богописанная; / Радуйся, камению, воду жизни источивший жаждущим.

Радуйся, Владычице, / милостивая о нас пред Богом Заступнице.

Кондак 3

Сила Вышняго осеняше страну Тихвинскую егда икона Пречистыя Богоматере, многочастне являющися и временным пребыванием освящаючи землю, к воздвизанию храмов святых возбуждаше, да славится имя Владычицы во славу Триипостаснаго Бога, Емуже вопием: Аллилуиа.

Икос 3

Имуще благоутробное изволение, да людие страны Тихвинския вожделеют пребывания Твоего с ними да памятуот выну покров Твой, икону Твою являла еси многочастне, дондеже указала еси богоизбранное место вселения ея. Темже чудящесе вопием Ти:

Радуйся, скиние, в нейже вселися Божество телесне;/ **Р**адуйся, святая святых, в неюже единою вниде вѣчный Архиерей.

Радуйся, кивоте позлащенный Духом, Законодателя носивший;/ **Р**адуйся, светильниче, огнем Божественным возжѣнный.

Радуйся, стамно, носившая манну жизни Христа;/ **Р**адуйся, трапезо, хлеб животный вместившая.

Радуйся, кадиланице, уголь Божества имущая, мир весь облагоухавшая;/ **Р**адуйся, жезле цвет, прозябший Христа.

Радуйся, столпе, к вечному наследию руководяй;/ **Р**адуйся, облаче, от враг видимых и невидимых покрывай.

Радуйся, земле обетования;/ **Р**адуйся, руно, на негоже Христос, яко дождь сниде с небесе.

Радуйся, Владычице,/ милостивая о нас пред Богом Заступнице.

Кондак 4

Бурю смущения и скорби утолити тщася, благовернии людие взываше ко Господу: яви нам Божественный дар, егоже человеколюбие стране Российстей послал еси, не скрый сокровища, имже душевную нищету нашу обогатити надеяхомся, претвори печаль нашу в радость, отри слезы и рыдания. И улучивше желаемое, возопиша: Аллилуиа.

Икос 4

Слышав пастырь паствы своя радостное обретение и Матерь Пастыреначальника упасшюся в странах Тихвинских, устрояет храм в честь новоявленных иконы Ея, и пресвитеры учреждает, да выну прославляя Богоматерь вопиют Ей:

Радуйся, Дщи, приклонившая ухо ко гласу Отца Небеснаго;/ **Р**адуйся, яко праматернее сетование разрушися рождеством Твоим.

Радуйся, Невесто, Еяже доброты вождеде Царь Небесный;/ Радуйся, Царице, одесную Царя представшая.

Радуйся, рясны златыми украшенная и всю славу внутрь имущая;/ Радуйся, вводящая многих в чертог Царства Небеснаго.

Радуйся, яблоко, егоже благовоние обоняет весь мир;/ Радуйся, крине чистоты, блистанием светящийся.

Радуйся, миро благовонное, всему миру излианное;/ Радуйся, царскую порфиру, плоть Творца всех, из девственных кровей Твоих исткавшая.

Радуйся, живой запечатленный источнике, источивший воду жизни;/ Радуйся, мысленный винограде, гроздь Божественный возрастивший.

Радуйся, Владычице,/ милостивая о нас пред Богом Заступнице.

Кондак 5

Боготечная звезда явися икона Твоя, Богомати, вся страну Тихвинскую обтекаючи, и сущих во тьме невежества светом боговедения озаряючи, скорбящих радостию осияваючи, заблуждающих же на путь делания заповедей Сына Твоего и Бога наставляючи. Ему же благодарственне вопием: Аллилуиа.

Икос 5

Видев Георгий на кладе древа сидящу Жену, жезл червленый в руках имущу и светом неизреченным сияюще, Ейже предстоя беседоваше дивный Святитель, позна чрез благоухание благодати Тя, Богородицу, чувственный зрак приемшую и Святителя Николая предстояща Тебе, и возопи со трепетом:

Радуйся, доме, егоже созда Себе для вселения Премудрость Божия;/ Радуйся, Дево, Еммануила родившая.

Радуйся, жезле Иессеов, от негоже прозябе цвет Христос Бог;/ Радуйся, Невестная Невесто, осенением Духа заченшая Сына.

Радуйся, свитче, в немже перстом Отчим написася Слово;/ Радуйся, книго девства запечатленная, Иосифу на хранение врученная.

Радуйся, клеще таинственная угли Божества во чреве приемшая;/ **Радуйся**, престоле превознесенный, на немже плотию возседе Христос.

Радуйся, облаче легкий, на немже прииде Господь славы;/ **Радуйся**, врата затворенная, имиже един Христос пройде.

Радуйся, горо несекомая, от неяже краеугольный камень отсечеса, Христос;/ **Радуйся**, огнеросная пеще, неопально приемшая огонь Божества.

Радуйся, Владычице,/ милостивая о нас пред Богом Заступнице.

Кондак 6

Проповедник быв видимаго Твоего пребывания в стране Тихвинстей и дивнаго промысления о ней, благочестивый Георгий явление Твое и волю Твою людем возвести, ейже неповинующися чудеса вразумляются славити Тя, Владычице, и пети Богу: Аллилуиа.

Икос 6

Возсияти свету Богопознания явлением иконы Твоей изволившая, и свет иноческа жизни возжещи благоволила еси, Богомати, на месте явления Твоея иконы, да иноков лица вопиют Ти непрестанно:

Радуйся, неплоднаго корене плодоносное прозябение;/ **Радуйся**, от младенчества Богу посвященная.

Радуйся, во святем храме воспитавшаяся;/ **Радуйся**, Богу уневесившаяся.

Радуйся, всеми добродетельми преукрашенная;/ **Радуйся**, светоносная палато, Владыце уготованная.

Радуйся, благодатию Божию предочищенная;/ **Радуйся**, от начала веков во главизну нашего спасения предызбранная.

Радуйся, Невесто Архитектона небеснаго, земному тектону на хранение врученная;/ **Радуйся**, малый Назарет Своим пребыванием возвеличившая.

Радуйся, горних сил похвало;/ **Радуйся**, всех земнородных слава.

Радуйся, Владычице, милостивая о нас пред Богом Заступнице.

Кондак 7

Хотящим преподобным Мартирию и Кириллу во уединении подвижатыся и труды и подвиги иноческыми Богу угождати, путь в место вожделеваемаго подвига в столпе огненнем и гласе указала еси. Они же познавше Тя, яко Одигитрию благую, спутьшествующую им, возопиша Богу: Аллилуиа.

Икос 7

Новый источник чудес в стране северней явися икона Твоя Тихвинская, Пресвятая Владычице, независтно точащий изцеления всем притекающим с верою: слепии бо презирают, немии благоглаголиви бывають, глусии слышат, расслаблении возстають, бесноватии от уз демонских свободяются. Темже славяще Тя, возопием:

Радуйся, яко на Тебе почи благоволение Отчее;/ **Р**адуйся, Духом Святым осененная.

Радуйся, яко в Тебе воплотися Сын Божий, Спас миру;/ **Р**адуйся, совета неизреченнаго Таиннице.

Радуйся, от Ангела благовестие приемшая;/ **Р**адуйся, ангельским, еже радуйся, весь мир обрадовавшая.

Радуйся, яко Господь с Тобою;/ **Р**адуйся, яко Тобою вси земнороднии Богу приближишася.

Радуйся, Благословенная в женах;/ **Р**адуйся, всем женам благословение даровавшая.

Радуйся, Мати до рождества и по рождестве пребывшы Девою;/ **Р**адуйся, начаток чести и славы девства.

Радуйся, Владычице,/ милостивая о нас пред Богом Заступнице.

Кондак 8

Странно чудо явления образа Твоего, Владычице, и несказанно, удивляет премирная и ужасает земная, вкупе же и просвещает благодатию рождшагося от Тебе Христа Бога нашего. Странно и заступление обители от врагов, хвалившихся разорити достояние Твое. Сего ради вопием Богу: Аллилуиа.

Икос 8

Вся еси в вышних, Владычице, но и нижних не оставляеши, защищающи, аки стеною и забралом, честною иконою Твоею обитель Твою. Рекла бо еси, егда бысть нашествие вражие, да возмут людие икону Мою и обыдут по стенам окрест, и узрят милость Божию. Темже избавлении Тобою от враг возопиша Тебе:

Радуйся, Мати Творца и Господа Своего;/ **Р**адуйся, Еяже ради младенец Иоанн възграся во чреве Елисаветы.

Радуйся, от всех родов ублажаемая;/ **Р**адуйся, смирением возвышенная.

Радуйся, небесным радование и земным мир рождением Твоим даровавшая;/ **Р**адуйся, от Ангелов славословие, от пастырей величание, от волхвов поклонение о рождении Твоем приемшая.

Радуйся, млеко питавшая горняя и дольняя благодатию Своею Питающаго;/ **Р**адуйся, пеленами повившая Одевающагося светом, яко ризою.

Радуйся, носившая на руку Твоею Носящаго весь мир дланию;/ **Р**адуйся, во храм принесшая священство храма.

Радуйся, Симеоном благословенная;/ **Р**адуйся, Анною пророчицею возвеличенная.

Радуйся, Владычице,/ милостивая о нас пред Богом Заступнице.

Кондак 9

Всякаго естества ангельскаго чистейши сущи, Владычице, обитель, ради пришествия Твоея иконы созданную, от нечистоты греховных близ погибели бывшую, но покаянием очистившуюся, яко общая Молебница о роде христианском избавила еси от врагов, по подобию нечистых животных подкопати ю трудившихся. Темже вопием Богу: Аллилуиа.

Икос 9

Вития многовещанная недоумеют воспети по достоянию множество чудес Твоих, Владычице, и тайны Твоего строения спасения челоуков: ово бо благостию, ово же посещением наказаний руководиши людий на путь спасения. Зане небориму обитель сохранивши от

врагов видимых, огненным очищением благоволила еси очистити от уязвлений врага невидимаго, вразумляя, яко чистота, воздержание и молитвы сердечныя угоднее Тебе паче хвалы единых точию уст. Темже вопием Ти:

Радуйся, Египет освятившая пришествием Твоим;/ **Радуйся**, Галилейскую страну прославившая пребыванием Твоим.

Радуйся, по всему Иерусалиму искавшая Отроча Твое, Егоже возлюби душа Твоя;/ **Радуйся**, в дому Отца Его обретающая Его.

Радуйся, вся глаголы о Сыне Твоем слагавшая в сердце Своём;/ **Радуйся**, в Сыне Твоем прежде всех познавшая Бога.

Радуйся, Сыну Твоему послужившая в земном житии Его;/ **Радуйся**, страданием Его спострадавшая.

Радуйся, при Кресте Сына Твоего усыновление Иоанна Апостола и всех верующих приемшая;/ **Радуйся**, матерински возлюбившая искупленных кровию Его.

Радуйся, первее всех уразумевшая тайну воскресения Сына Твоего;/ **Радуйся**, премногий радости насладившаяся в вознесении Сына Твоего на небеса.

Радуйся, Владычице,/ милостивая о нас пред Богом Заступнице.

Кондак 10

Спасти хотящи многия люди от обдержавших их скорбей и болезней и веру их утвердити во всеильное заступление Твое, Владычице, во многих градах, обителех, всех православных страны силу чудотворения даровала еси изображением честных иконы Твоея, да видяще являемую Тобою милость, вопиют со умилением Богу: Аллилуиа.

Икос 10

Стена и щит была еси, Владычице, православному воинству, под знаменем Твоея иконы противу двадесяти язык воинствовавшему, сохраняя его от стрел вражиих. Темже буди стена и покров от всех врагов видимых и невидимых и нам, ко пречестней иконе Твоей с верою и любовью припадающим и вопиющим Тебе:

Радуйся, утешение верным по вознесении Сына Твоего;/ **Радуйся**, Учительнице и Споспешнице Апостолом.

Радуйся, извещением Твоего к Богу отшествия обрадованный;/ Радуйся, лик ученический облаком к погребению Ти совокупляя.

Радуйся, от земли дланьми Сына Твоего восприемлемы;/ Радуйся, от всех ангельских чиновначалий провождаемая.

Радуйся, земное небо к горнему селению возвышенное;/ Радуйся, престоле Господень, от земли вознесенный в Царствие Небесное.

Радуйся, воздух освятившая восхождением Твоим;/ Радуйся, чрез Фому уверившая Твое на небо с плотию преселение.

Радуйся, ученическому лику обещание хранить его исполняя;/ Радуйся, присещением Твоим от Сына Твоего и Бога мир тому подавшая.

Радуйся, Владычице,/ милостивая о нас пред Богом Заступнице.

Кондак 11

Пение всякое побеждается, спростретися тщася ко множеству чудес, приснобываемых от святых Твоея и чудотворных иконы. Якоже бо скорая Помощница недуги исцеляеши, от бед избавляеши, от мучения демонов свобождаеши, на всяком месте с верою Тя призывающих и вопиющих Богу: Аллилуиа.

Икос 11

Светоприемную свещу зрим святую икону Твою, Богомати, во странах Тихвинских благодатию Твоею возженную, всю страну просвещающую и многих ко свету своему привлекающую на спасение душ. Темже вопием Ти:

Радуйся, сохранять и спасати всех призывающих Тя обещающая;/ Радуйся, прославляющих Тя прославляющая.

Радуйся, к Сыну Твоему и Богу молитвы верных приносящая;/ Радуйся, и Сама непрестанно у престола Сына Твоего и Бога молящаяся о всех.

Радуйся, благодать Твою иконам Твоим честным даровавшая;/ Радуйся, всю вселенную лучами Твоея благодати озарившая.

Радуйся, Честнейшая Херувим и Славнейшая Серафим;/ Радуйся, вся твари высшая.

Радуйся, Царице Не́ба и землі;/ Радуйся, яко много может молитва Твоя пред Сы́ном Твои́м.

Радуйся, всего рода христианскаго скорое заступле́ние;/ Радуйся, всех верных твердое упова́ние.

Радуйся, Влады́чице,/ милостивая о нас пред Богом Засту́пнице.

Кондак 12

Благодати Твоя новое знамение дати восхотев, Петрову граду источник чудес отверзла еси, Богомати, в иконе Твоей, да верующии вразумляются, труждающиися и скорбящии обретают готовое прибежище и заступление, прославляючи Бога даровавшего таковая, вопиют Ему: Аллилуиа.

Икос 12

Поюще чудеса Твоя и милости роду нашему явленныя, умильно припадаем к пречистому образу Твоему, Владычице, и лобызающе, со страхом и любовью молим Тя: настави нас на путь спасения, да достойни будем выну Твоего милостиваго заступления, буди присно Заступница и Ходатаица о нас, вопиющих Ти:

Радуйся, верных утверждение и защище́ние;/ Радуйся, неверных вразумление и просвеще́ние.

Радуйся, отчаянных Наде́ждо;/ Радуйся, грешных спасе́ние.

Радуйся, печальных утеше́ние;/ Радуйся, больных изцеле́ние.

Радуйся, вдов и сирот покрóве;/ Радуйся, обидимых прибе́жище.

Радуйся, царей укрепле́ние;/ Радуйся, святителей удобре́ние.

Радуйся, де́вствующих похвало́;/ Радуйся, всех благочестивых весе́лие.

Радуйся, Влады́чице,/ милостивая о нас пред Богом Засту́пнице.

Кондак 13

О Всепетая Мати, рождающая всех святых Святейшее Слово, нам покров и защищение в жизни сей от врагов видимых и невидимых, от бед и скорбей, сохрани от искушений и грехопадений, и в будущей жизни, на суде Сына Твоего и Бога нашего, буди Заступница и Хо-

датаица, избавляющи нас от вечнаго осуждения, да спасеннии Тобою, с лики ангельскими вопием Богу: Аллилуиа. **Трижды.**

Икос 1

Ангелов лица ликовствующе служат Тебе, Владычице, и почитающе Тя, на руку Твоею носившую Творца видимыя и невидимыя твари, икону Твою с места на место преносят. Мы же, земнороднии, дивящиеся чудному явлению иконы Твоея, Ангелы носимыя, вопием Ти сице:

Радуйся, всех Небесных Сил вы́сшая;/ **Р**адуйся, вся ангельския чины превосходя́щая.

Радуйся, Честне́йшая Херув́им;/ **Р**адуйся, Славнейшая без сравне́ния Сераф́им.

Радуйся, радование Ангелов;/ **Р**адуйся, похваление ликов небесных.

Радуйся, от Ангелов воспева́емая. **Р**адуйся, от Серафимов прославля́емая.

Радуйся, от Архангел поклоня́емая;/ **Р**адуйся, от воинств небесных почита́емая.

Радуйся, в иконе Твоей от Ангел чтима́я;/ **Р**адуйся, в видимем образе Твоем от невидимых сил носима́я.

Радуйся, Влады́чице,/ мило́стная о нас пред Богом Засту́пнице.

Кондак 1

Взбра́нной Воеводе, Владычице нашей Богоро́дице/ благодарственная пёния восписуем о явлении чудныя Ея ико́ны,/ к Не́йже притека́ющей присно избавляются от враг видимых и невидимых./ Ты́ же, Госпоже Не́ба и земли, яко милосердная Ма́ти,/ прими ныне ма́лое сие моление на́ше/ и неотсту́пну никогда же сотвори милость Твою от нас и заступле́ние,/ охраняющи от всех бед и напастей нас, зову́щих Ти:// **Р**адуйся, Владычице, милостивая о нас пред Богом Засту́пнице.

Молитва перед Тихвинской иконой Пресвятой Богородицы.

Благодарим Тя, о Преблагая и Пречистая, преблагословенная Дево, Владычице, Мати Христа Бога нашего, о всех благодеяниях Твоих, яже показала еси роду человеческому, наипаче же нам, христоименитым людям Российскаго народа, о нихже ниже самый ангельский язык к похвалению доволен будет, якоже и ныне удивила еси неизреченную свою милость на нас, недостойных рабех Твоих, престественным самопришествием Пречистыя Твоея иконы, ею же всю просветила еси Российскую страну: темже и мы, грешнии, со страхом и радостию покланяющесе, вопием Ти: о Пресвятая Дево, Царице и Богородице, спаси и помилуй вся люди, и подаждь им победы на вся враги их, и сохрани царствующия грады, и вся грады и страны христианския, и сей святыи храм от всякаго навета вражия избави, и всем вся на пользу даруй, ныне пришедшим с верою и молящимся рабом Твоим, и покланяющимся Пресвятому образу Твоему: яко благословенна еси с рождшимся от Тебе Сыном и Богом, ныне и присно и во веки веков. Аминь.

Тропарь Пресвятой Богородице перед Ея иконой, именуемой "Тихвинская".

Тропарь, глас 4:

Днесь яко солнце пресвѣтлое/ возсия нам на воздухе всечестная икона Твоя, Владычице,/ лучами милости мир просвещаящи,/ юже великая Россия, яко некий дар Божественный/ свыше благоговейне восприемши, прославляет Тя,/ Богомати, всех Владычицу,/ и от Тебе рождагося Христа Бога нашего величает радостно./ Емуже молися, о Госпоже Царице Богородице,/ да сохранит вся грады и страны христианския/ невредимы от всех навет вражиих,/ и спасет верою покланяющихся Его Божественному/ и Твоему пречистому образу, // Дево Неискусобрачная.

Кондак, глас 8:

Притецем, людие, к Деве Богородице Царице,/ благодаряще Христа Бога,/ и к Той чудотворней иконе умильно взирающе припадём,/ и возопием Ей: о Владычице Марие!/ Присетивши страну сию Твоего честнаго образа явлением чудесно,/ спасай в мире и благоденствии вся христианы,/ наследники показующи небесныя жизни. // Тебе бо верно зовем: радуйся, Дево, мира спасение.

Молитва, завершающая Канон Молебный ко Пресвятой Богородице, который читается православными перед Причащением.

Царице моя Преблагая,/ надеждо моя Богородице,/ приятелище сирых/ и странных предстательнице,/ скорбящих Радосте,/ обидимых покровительнице!/ Зриши мою беду,/ зриши мою скорбь,/ помози ми яко немощну,/ окорми мя яко странна./ Обиду мою веси,/ разреши ту, яко волиши:/ яко не имам иныя помощи разве Тебе,/ ни иныя предстательницы,/ ни благия утешительницы,/ токмо Тебе, о Богомати,/ яко да сохраниши мя// и покроеши, во веки веков. Аминь.

Пркимен, глас 4: Помяну имя Твое/ во всяком роде и роде.

Величание:

Величаем Тя,/ Пресвятая Дево,/ Богоизбранная Отроковице,/ и чтим Образ Твой Святой,/ имже точиши исцеления// всем с верою притекающим.